



INTRODUCZIUN

DA MARCEL KÖHLE

Lucas tschenta all'entschatta da siu evangeli ina cuorta introducziun. En quella descriva igl autur, tenor tgei principis ch'el ha scret quei text: «Aschia sun era jeu – suenter esser s'informaus manedlamein da tut dapi l'entschatta – sedecidius da metter per scret ils fatgs in suenter l'auter.» Cun quella empermischun d'haver retschercou bein, surdat Lucas siu text d'evangeli ad in lectur che senumna Teofilus. Il plaid grec «theophilos» munta «amitg da Diu».

Biars scienziain dalla Bibla menziuneschan en quei context che Lucas s'adresa buc ad ina persuna concreta cul num Teofilus, mobein a tut quels che legian igl evangeli sco «amitgs da Diu».

Era nus essan adina puspei envidai dad udir e tedlar il plaid da Diu sco ses amitgs, il qual duei gidar nus da metter nossa cardientscha sin in bien fundament che porta nus tras il mintgadi.

EVANGELI

Lc 1,1–4; 4,14–21

¹Gia biars han empruau da dar in rapport dils eveniments ch'ei succedi en nies miez. ²Els ein sebasai sils raquens da quels ch'ei sezs stai perdetga d'entschatta enneu e daventai survients dil plaid.

³Aschia sun era jeu – suenter esser s'informaus manedlamein da tut dapi l'entschatta – sedecidius da metter per scret ils fatgs in suenter l'auter per tei, zun stimau Teofilus. ⁴Cheutras sas ti seperschuer che l'instrucziun che ti has retschiert ei beinfundada.

¹⁴E Jesus ei returnaus ella forza dil Spert en Galilea. E la nova dad el ei serasada per tut la cuntrada.

¹⁵El instrueva en lur sinagogas e vegneva glorificaus da tuts. ¹⁶El ei era vegnius a Nazaret, nua ch'el era carschius si. E tenor sia izonza eis el ius il sabbat ella sinagoga ed ei levas en pei per legger avon.

¹⁷Ins ha purschiu ad el il cudisch dil profet Jesaja. Arvend il cudisch, ha el anflau il liug, nua ch'ei stat scret:

¹⁸Il Spert dil Segner ei sur mei, pertgei el ha unschiu mei.

El ha tarmess mei per purtar la buna nova als paupers,
per annunziar liberaziun als perschuniers
e la vesida als tschocs,
per dar la libertad als squitschai.

¹⁹ed annunziar in onn da grazia dil Segner.

²⁰Ussa ha el serrau il cudisch, ha turnau el al survient ed ei sesius. Ils egls da tut quels ella sinagoga fuvan drizzai sin el. ²¹Ed el ha entschiet a dir ad els: Oz ei secumplenius quei plaid dalla Scartira che vus veis udiu.